



Tir Yimym

www.tiryimym.in

Regd. No. RNI. NAGAAO/2004/13113. Postal-NE/RN-717.

e-mail : tiryimym@gmail.com

TAPAK 8

Yangia anidakangma :



Tir Yimym



tir_yimym



tir yimym

TAPAK 7

India squad nung Suryansh-i Nitish Kumar melenogo

Pakistani rights activist Mahrang taküm tepeyong tepuokdaki yokogo

VOL. XXIII ISSUE NO. 252 (ADOK 252) DIMAPUR YANGTEPNÜ (THURSDAY) AAMI (JUNE) 25, 2026

₹ 5.00

Minister Nath-i Advisor Er. Picto Shohe den ajurutep

Dimapur, June 24, 2026 (TYO): Tripura nung Power Minister Ratan Lal Nath-i Nagaland nung New and Renewable Energy Advisor Er. Picto Shohe den senden ka menogo.

June 23, 2026 nü State Secretariat nung senden amendang northeastern state ana tsüngda tesentaktep akangshitepsü asoshi jembi.

Iba senden ajanga state ana tsüngda amalitep tajungba akümtsü tebilembatem lemsatepogo ta Minister Nath-i ashi.

Tenati renewable energy ulushitsü aser welfare maparen indang lemsatep aser tenaprongi Northeast state tem tsüngda energy space atema amalitep tajung aliba den tangatetba tasen ajanga terenlok bener arutsü asadangtep.

Ibala sensaksem ajanga Northeastern state tem tsüngda tesentaktep akangshir aser külemi aintsü atema lenmangtem lapoktsür. Renewable energy nung külemi yaritepba ajanga northeast nübortem kanga ajangzüksü ta Nath-isa ashi.

MP Supongmeren-i Phek DISHA senden nung aden



Phek Deputy Commissioner Office nung MP S Supongmeren Jamir, Advisor Kudecho Khamo aser tanga ketdangsürtem DISHA senden nung adendang agiba noksa ka angur.

Dimapur, June 24, 2026 (TYO): Lok Sabha MP S Supongmeren Jamir-i Phek nung District Development Coordination and Monitoring Committee (DISHA) senden nung denogo.

June 24, 2026 nü Deputy Commissioner Office indang Conference Hall nung senden amendang MP Supongmeren-i DISHA züngsemtem dang nübor nem osang jungjunga prokshitsü ayongzüük.

DISHA züngsemtemi sorkar scheme balala indang osang prokshitsüla. Sorkar mapa kanga ajema kümogo anungji nübortemi entrepreneurship aser tanga lenmangtem bushitsüla ta pai ashi.

Phek district nung ali peria dang lir anungji aluyimtsü aser shiruru metsütsü lenmang tesadem lir ta Supongmeren-i ashi.

"2017 nungi old-age pension scheme kübok beneficiary tasen mezüngokba atema süoki ia bilemer aser iba onük ya bangdak ministry den jembitsü. Ano, mapang shitak nung victim compensation agütsütsüla aser iba inakyim nung mapang magitsüla" ta paisa metetdaksü.

"MP Supongmeren-i state renloktsü atema mapa balala inyakba asoshi Chakhesang nung tenüng nung kanga pelar" ta CAWD Advisor Kudecho Khamo-i ashi.

Paisa department aser

sendaktepa alirtem dang nübortem ajangzüksüsa terenlok mapatongtem aser welfare schemes nendaka inyaktsü ayongzüük.

"Sorkari bangdak department aser ministry tem den welfare maparen takok ngua inyaka aotsü atema teintet rogotem, amitsürtem aser persons with disabilities (PwDs) tejangja bendentsüla" ta Advisor Khamo-isa ashi.

Iba senden nung State-level DISHA züngsemtem- Medokul Sophie aser Toshipokba Longkumer na aden.

Senden nung Chief Veterinary Officer (CVO) ajanga Department of Animal Husbandry and Veterinary Services, District Education Office (DEO) Phek, District Welfare Officer (DWO) ajanga Social Welfare Department aser Mission Shakti kübok SANKALP-District Hub for Empowerment of Women (DHEW) ajanga PowerPoint presentations sayua liasü.

Phek Deputy Commissioner aser DISHA Member Secretary Rhousietho Nyuthe-ia district nung POCSO ken o tem kanga bulua akümba indang osang lemsatep.

Iba senden amenba sülen MP Supongmeren Jamir, Advisor Khamo, committee züngsemtem aser heads of offices-i süngdong atemba maparen ka nung shilem agia liasü.

Nagaland Connect 2026-Delhi nung Rs 30 crore CSR nangzüükogo



Dimapur, June 24, 2026 (TYO): Investment & Development Authority of Nagaland (IDAN) ajanga ayongzüka agiba Nagaland Connect 2026 nung Rs 30 crores tema CSR maparen inyaktsü tenangzüka agiogo.

Iba CSR Conclave nung Chief Minister Dr. Neiphiu Rio aser Deputy Chief Minister ana- TR Zeliang o Y. Patton nung lia IDAN nem Letters of Interest and commitments 15 agütsü.

Iba sentong ya Jacaranda Hall, India Habitat Centre, New Delhi nung "Forging Partnerships, Creating Impact" omen nung ajemdaker agi.

Investment & Development Authority of Nagaland (IDAN)-i CSRBox den yaritepa ayongzüka sentong nung company 40 tema aden aser

Corporate Social Responsibility (CSR) partnerships yanglua liasü ta IDAN Press & Media-i sangdong ka nung ashi.

"India nung corporate sector ajanga Northeastern State ya teyari agütsüdak ka ama masü saka maongka anguba tesem ka ama züngshitsüla" ta Chief Minister, Dr. Neiphiu Rio-i ashi.

"Tanü Nagaland ya teyari agütsüdak ka dang masü saka maongka angudak ka lir. Nagaland nung lanuputu ya India'er Act East Policy kübok lir Nagaki Incubation City amala maparen ajanga Nagaland ya terenlok alidak aser mapa inyakdak tesem ka ama yanglur" ta Dr. Rio-isa ashi.

"Nagaland state sorkari education, livelihoods, healthcare, sports, environmental sustainability, women's

empowerment aser youth development nung temulung agütsür aser sorkari IDAN ajanga "single-window platform" ka yangluogo aser iba ajanga CSR partnerships nung temulung agütsür. Tanü ni nenok mapatong inyaktsü atema dang masü saka nübortem aser takoktsü lenmangtem nung senotsü rizüngtsü jaoker" ta paisa metetdaksü.

"India renlokba otsü nung Nagaland-ia tongtipang shilem agir. Tayongzüka jenti liaka Nagaland-i India renloka aoba aser linük yangerba maparen nung tongtipang shilemtem agia arur" ta IDAN Chairman aser Advisor to the Chief Minister Abu Metha-i ashi.

Paisa company tem dang Nagaland nung meta talang pilar alidak temulung agüja CSR initiatives inyaktsü ayongzüük.

Assam-Nagaland arrtsülen prangpong shibelener 2 apu

Dibrugarh, June 24, 2026 (Agencies): Assam nung Charaideo Police, Sivasagar Police aser Assam Rifles külem telok kati Assam-Nagaland arrtsülen prangpong shibelener nising ana puogo.

Tena ya Rajibul Islam aser Moina Ali na tajangjaogo. Osang tejangja ka angazükba sülen

Charaideo district nung arrtsülen mita aodang tena ket nung .22 calibre pistols ana bena lia apu.

Assam-Nagaland arrtsülen ozüngi memelaba prangpong shibenelenba azüoktsü aser security akangshitsü atema operation inyakba nung iba ya shilem ka lir ta ketdangsürtemi ashi.

"Onoki arms supply ken o ka dak sendakba nung nisung ana puogo. Tenati prangpong bener aru aser Namtola nung tangar kar nem agütsütsü sentong liasü. Onoki iba asoshi bushisüngdang südar" ta Charaideo Senior Superintendent of Police (SSP) Surjit Singh Paneswar-i ashi.

Nagaland nung IAF Agniveervayu recruitment rally alitsü

Dimapur, June 24, 2026 (Agencies): Nagaland nung taküm September ita Indian Air Force indang Agniveervayu scheme atema open recruitment rally ka agitsü sentong lir.

Kohima nung Special Secretary (Home) ajanga ayongzüka amenba senden ka nung iba lemtet agiogo.

Home Department aser tanga department temi recruitment rally atema sentongtem renemdar aser iba ajanga Nagaland nung lanurtemi Indian Air Force nung adentsü maongka angutsü.

Iba rally ya Nagaland Armed Police Training Centre, Chümoukedima nung agitsü kechiyong idakji infrastructure

aser logistical facilities teimba lir ta telemetba agiogo.

Senden nungsa Police Headquarters (PHQ) Nagaland nem Indian Air Force ketdangpurtem den amalitepa inyaktsü atema 1st Nagaland Armed Police, Chümoukedima nungi nodal officer ka shimtsü mapa lemozüksüogo.

Maneni, Health and Family Welfare Department-ia rally agi piyong doctor anati anir medical team ka den supporting staff aser ambulance ka ajanga yaritepsü.

School Education Department-ia District Education Officer, Chümoukedima ajanga tesayur pezü mapa lemozüksütsü aser parnoki candidate indang

kulikakettem verification aser authentication asüba nung yaritepsü.

Külen, Home Department-i PHQ den amalitepa transportation facilities acha-ayangtsü aser Department of Information and Public Relations (DIPR)-i state ajungalen print, electronic, digital aser social media sabangtem ajanga iba recruitment drive indang osang prokshitsü.

Senden nungsa Indian Air Force (IAF)-i rally matongdang anogo 45 jakedang eligibility criteria aser qualification requirements tejangja densema recruitment notification agütsütsü atema telemetba agiogo.

Dimapur DPDB senden nung lungjemer inyaktsü ajungshitep



Dimapur DPDB senden aliba mapang tangokba noksa angur.

Dimapur, Aami/June 24 (TYO): District Planning and Development Board (DPDB), Dimapur ita shia amenba senden June 24, 2026 nü Deputy Commissioner, Dimapur indang Conference Hall nung Advisor, Industries & Commerce aser Chairperson DPDB Dimapur, Hekani Jakhalu lenisüba kübok mena liasü.

Senden tenzüka Deputy Commissioner and Vice-Chairman DPDB Dimapur, Dr. Tinojongshi Chang, NCS-i Dimapur DPDB Chairperson tasenba pela agizük aser Board nung Ruzonyi Wideo, CEO, Dimapur Municipal Council; Matsung Aier, Senior Treasury Officer; Viwheto Thorie, District Agriculture Officer; aser Nyuvisie Nyusou, R O, Art & Culture Department densema züngsem tasentep pelashishia agizüka liasü.

Advisor Jakhalu-i senden nung jembidang züngsem ajunga dang bendanga agütsür telungjem nung Dimapur district lenla ajungalen renloksü asoshi külemi inyaktsü ayongzüka liasü.

Sorkar indang sentongtem takok ngua mapa kuma inyaktsü aser terenlok mapatem inyaktsü atema kati ka den yaritepa amaliteper inyaktsü tongtipang lir, ta lai ketdangsür aser

züngsemtem dang ashi.

State nung tongtipangtiba shishilempadak tesepe, Dimapur nung arua mapa inyaktsü ya tia taka lir, anungji ajaki iba maongka amshia nüburtem tajungüba nung tenzüksüla, ta lai ashi.

Küm ka la chairmanship kübok züngsem ajunga külemi teka amteper inyaktsü aser district ainba aser terenlok asoshi shilem tajung agitsü imlar, ta ashi.

Iba senden nung society registration indang jembia aser Dimapur Athletic Association, Rise and Lead Foundation, aser Nagaland E-Sport Association society registration agitsü temelaba agüja liasü. Covenant Foundation registration atema taruba DPDB senden nung jembitsü lemtet.

ITIKI Montessori School nungi ITIKI School, Darogapathar, Dimapur melentsü aser Grace Foundation School, Duncan Bosti Class V nungi Class VIII (Upper Primary Level) tashi upgrade asütsü benokba onük taruba senden nung jembitsü lemtet.

District nung tetsür chanu aser tanurtem kumzüka ayutsü atema Police Department-i awareness agütsüba aser mera balala agiba indang osang Commissioner of Police,

Dimapur, Aotula T. Imchen, IPS ajanga lemsatepa liasü.

Lai tanurtem kumzüka ayutsü asoshi police, childline, welfare agencies, schools, health institutions aser nübur nungi lenirtem sendaktepa aliba 'unified child protection system' ka nüngdaker ta ashi.

Tanur ka kumzüka ayutsü aser par temeden shidak agütsütsü mapa ya aroki ochishia inyaktsüla, ta ashi.

2022 küm POC SO cases tenet aliba 2025 küm 15 akum, 2025 küm samar aliba tanur 216 nguteta liasü, ta CP Dimapur, Aotula-i ashi. Tanur samaba cases aika jena aoba yimya nung lir, anungji stakeholders temi tenük yoka alitsü nüngdaker, ta ashi.

Iba senden nungsa Dimapur nung traffic mesümenangba indang jembia aser Meren Chenth, DCP (Traffic) ajanga PowerPoint presentation ka agüja liasü.

DCP Traffic aser Naga Council Dimapur ajanga district nung traffic mesümenangba ajemtsü asoshi proposals agütsüba

Deputy Commissioner-i pela agizük aser nüburtem ajangzüksü atema temaba ketdangsür dangi temelaba meshia yoktsü ta shia liasü.

NEZCC-i Guru Shishyaa Parampara Scheme atema application meshir

Dimapur, Aami/June 24 (TYO): North East Zone Cultural Centre, Dimapur-i 2026-2027 atema Guru Shishyaa Parampara Scheme agitsü asoshi application meshir.

Region nung sobaliba tsüngsang/ken, bamboo/cane/wood craft, folk theatre, woodcraft, mask making amala nung training agütsütettsüsa alir arishi küm 45 nungi 70 tsüngta candidates temi apply sütettsü. Region

nung dying & Vanishing artforms nung tali rangloksü, ta sangdong ka ajanga ashi.

Guru ama shimba sülen, pa/lai Assistant ka aser Shishyaa (arishi küm 15-25 tsüngta) pezü shimtsü aser küm ka atema training agütsütsü. Küm ka atema Guru nem ita shia sen 7,500 agütsütsü, Assistant nem sen 3,750 aser Shishyaa nisung shia ita nung sen 1,500 agütsütsü.

Application den bio-data

aserteyari documents tem pei state indang Directorate of Art & Culture/ Cultural Affairs dangi yoktsüla/agütsütsüla. Application ya August 31, 2026 tashi agizüktsü. Application Forms aser tanga osang tejangja NEZCC website www.nezccindia.org.in (<http://www.nezccindia.org.in/Home/Advertisement>) <https://www.facebook.com/nezccdimapurNE> nung angutsü, ta ashi.

Mokokchung nung District Walkathon ayongzüük

Dimapur, Aami/June 24 (TYO): Nasha Mukta Bharat Abhiyan (NMBA) nüngtem nung "NMBA: Viksit Bharat kePehchaan" omen nung rangloker temesepba mozü maliba lokti kumdaktsütsü asoshi District Walkathon ka June 24, 2026 nü Mokokchung nung ayongzüka liasü.

Iba sentong ya Senior Superintendent of Police (Sr.

SP), Vesupra Kezo-i tenzüksü. Iba walkathon ya Deputy Commissioner office nungi tenzük aser Mokokchung Public Ground nung tembang.

Iba sentong nung kaketshir aser district ketdangsürtem dena liasü. Public Ground nung sentong tatsüka agidang, Assistant Commissioner & Nodal Officer for NMBA Mokokchung, Dr. Madhavi R,

IAS-i lokti den jembia liasü.

Temesepba mozü amshiba nungi kumzüka alitsü atema awareness tali agütsütsü aser nübur ajungai mera agitsü ajungmesoa iba sentong ya ayongzüük, ta lai ashi.

Additional Deputy Commissioner (ADC) Mokokchung, Atsungba Walling-i shilem agir ajunga NMBA pledge agia liasü.

Mokokchung nung June 28 nü National Immunization Day alitsü

Dimapur, Aami/June 24 (TYO): Chief Medical Officer, Mokokchung ajanga district

nung arishi küm 0 nungi 5 tsüngta tanurtem asoshi National Immunization Day ya June 28, 2026 nü amungtsü sentong lir ta metetdaksüogo.

CMO-i tsürabor, kinunger aser nisung taintem dang item tanurtem polio vaccine tzüjang ana jemdaktsütsü ayongzüükogo. Immunization drive ya district

nung Intensive Pulse Polio Immunization (IPPI) booths amenoka alidak agitsü.

Nüburtemi osang tejangjaba metettsü asoshi anasatiba health centre den tongteprateptsü akok aser telephone ajanga Chief Medical Officer (CMO): 9436006387, District Immunization Officer (DIO): 9436607252 den jembitettsü, ta sangdong ajanga ashi.

Nagaland GIS & Remote Sensing Centre nung workshop ayongzüük

Dimapur, Aami/June 24 (TYO): Nagaland GIS & Remote Sensing Centre, Kohima nung June 23, 2026 nü technical workshop ayongzüka Directorate of Census Operations, Nagaland nungi ketdangsürtem dena liasü.

Iba sentong tenzüka Mhathung Kithan, Senior Project Director ajanga jembidang, Centre nung State indang map layers 350 dak tema lir ta ashi. Yimtsüng aser urban local bodies ajunga indang map tem georeferenced aser digitized süogo, ta pai metetdaksü.

Census operations shidak inyaktsü atema GIS hadir tem tongtipang ta angatetdakja, tang tasenba GIS technologies aser UAV imagery amshia kilen shia mapping tejangja inyaktettsü, ta Kithan-i ashi.

Nagaland GIS & Remote Sensing Centre ya A+ rated institute ka lir aser hopta ishika tsüngta UAV drone pilots asoshi licensed training institute ka akumtsü imlar, ta pai metetdaksü.

Sanen, Data Manager ajanga Centre nung database amshiba indang lemsatep aser Atho-o Kesiezie, UAV Engineer ajanga Centre indang projects tulu aser takok anguba kar lemsatepa liasü.

Ketdangsür temi Drone Centre of Excellence semdang, kong drone shilem balala 3D printing asüba sayua, drone assembly units aser training facilities repranga liasü.

Mhathung, Assistant Director, Directorate of Census Operations, Nagaland ajanga India nung mezüngbuba digital Census nung technology amshiba sayu aser Centre nungi technical teyari nüngdaksü ta ashi.

Department anaprongi tarutsü nung teka amteper inyaktsü asoshi lenmang bushitsü mulungtepa liasü.

Iba sentong nung urban aser rural mapping indanga aser mapping aser spatial analysis nung artificial intelligence amshiba indang jembia liasü.

Census Central Observer-i Kohima nung Enumerator & Supervisor training semdang



Dimapur, Aami/June 24 (TYO): Joint Director, Office of the Registrar General and Census Commissioner of India, aser Census Central Observer for Nagaland State for Census of India 2027 (HLO-Phase I), M. K. Tiwari-i June 24, 2026 nü Kohima district indang Enumerators aser Supervisors training agia aliba tesem semdanga liasü.

Iba mapang Tiwari-i B. Henok Buchem, NCS, Deputy Commissioner and Principal Census Officer, Kohima; District Census Officer, Kohima, aser Charge Officers tem den sensaksema liasü.

Pai training agiba reprangshima jaja aser data shidak bendentsü aser Census operations agitsü aliba atema kanga junga renemtsü tongtipang lir ta shia liasü.



June 24, 2026 nü External Affairs Minister, S Jaishankar (ajichi) South Korea yimtiba, Seoul tonga aoba mapang Indian Ambassador to Republic of Korea, Gourangalal Das-i agizükba sülen tangokba noksa nung angur.

Security atema BRICS ya tongti sabang ka lir: PM Modi

New Delhi, Aami/June 24 (Agencies): Ato kilonser Narendra Modi-i BRICS linüktem nungi National Security Advisors (NSAs) aser security ketdangsertem ajuruba mapang nung pai, tanü alima nung security dak sendakba tayongzükba balala koktettsü atema BRICS-i ano taliba amalitepa inyaktüsü, ta ashi.

Shisa lemsatepba mapang nung Modi-i, alima nung tensa kanga keraa melenshiba mapang nung security tsütsü amaliteptsü atema BRICS ya tongti sabang ka lir, ta ashi.

BRICS nung züngsem linüktemji Brazil, China, Egypt, Ethiopia, India, Indonesia, Iran,

Russia, Saudi Arabia, South Africa aser UAE lir.

Tesülen Modi-i X ajanga, "Alima nung temelenshi kanga aliba mapang nung security tsütsü amalitepa inyakba tsütsü tashi itshitsü aser tayongzükbatem koktettsü atema BRICS-i tongtibang shilem agitsüla. India nung chairmanship kübok atangji amalitepa inyaktüsü, Global South atema inyaktüsü aser alima kümzüka alitsüsa tensa yangluba nung shilem agitsü," ta ashi.

BRICS linüktem nungi NSAs senden nung okila jembidang NSA Ajit Doval-i alima nung kechi tensa

ajurutsüa memetetba tensa mapang ka aser rongsenkettzüng jenjang majungba ajanga takoksa balala anguba metetdaksüba den külemi alima nung tayongzükba balala kokatettsü atema BRICS-i tongti shilem agitsüla, ta ashi.

Ajit Doval-isa West Asia nung rara anentsü atema US aser Iran tsüngda tezüngzüktep ka agiba atema pelaba metetdaksü.

"Iba ya ajanga energy security jenjang tajungba akümtsü. Strait of Hormuz lapokba atema pelar. Iba ya ajanga supply chain tajungba akümtsü," ta pai ashi.

Ayatollah Khamenei asüpila sentong nung adentsü atema PM Modi jaok

New Delhi, June 24 (Agencies): Iran nung taoba mapang tongti lenir, Ayatollah Ali Khamenei asüpila sentong nung adentsü atema Iran Tir, Masoud Pezeshkian-i Ato kilonser Narendra Modi jaokogo, ta osang angazüker.

Ajisüaka tang tashi nungbo India-i iba dak sendakba official osang kecha magütsü.

Ayatollah Ali Khamenei asüpila dak sendakba sentong

ya July 5 nungi July 9 tashi agitsü.

Khamenei-i küm 30 tashi Iran yimsüsüa liasü. Taküm February 28 nü US aser Israel nati anünglen nungi Iran amakba mapang nung pa asü.

Khamenei asüpila sentong ya Tehran aser Qom yimti na nung July 5, 6 aser 7 anogotem nung agitsü aser tatembangbuba sentongji July 9 nü Mashhad yimti nung

agitsü.

Mashhad yimti ya Khamenei asoba tesem aser Shia Muslim nung atema temeshitiba yimtitem rongnung iba yimti densema lir.

Khamenei asüpila sentong ya taküm March ita nung agitsü tebilemba liasü, ajisüaka Middle East nung tensa tamajungba akümba ajanga mapang talangka thinena aruogo.

Ram tekülem ki tenla auyaba dak sendakba report ka agütsüogo

New Delhi, June 24 (Agencies): Uttar Pradesh kübok Ayodhya nung Ram tekülem ki tenla dak sendakba ochimashi ken o nung züngsem asemi akümba Special Investigation Team (SIT)-i state sorkar nem report ka agütsüogo.

SIT team-i mezüng bushisüngdangba report ji Mongolbarnü state home secretary, Sanjay Prasad nem agütsüogo, aser iba report nungji inyakyim aika meshidaki inyakba metetdakja lir ta osang angazüker.

SIT team nung züngsem asemji Lucknow Divisional

Commissioner Vijay Vishwas Pant, Inspector General of Police Kiran S aser Finance Department nung Special Secretary Neel Ratan nunger lir.

SIT team jagi Ram tekülem ki atema aruba hon aser senti osettem tenla dak sendakba record aika bushisüngdangba den külemi senotsü amshibaren aser CCTV footage ajak reprangogo.

Ram tekülem ki atema tenla agütsürtem aikati, ketdangsertemi parnok nem 'receipts' magütsü ta metetdaksüba osang aika jungkai adokdar.

(Maneni tapak 8 nung...)

Temzüng yanglushitsü asoshi BJP-i two-thirds majority bushir: Congress



June 24, 2026 nü New Delhi nung Congress MP, Jairam Ramesh-i interview ka nung jembidang tangokba noksa nung angur.

New Delhi, June 24 (Agencies): Congress party-i, BJP-i linük temzüng yanglushitsü aser reservations anentsütsü atema Lok Sabha nung two-thirds majority angutsü meranger, ta metetdaksü.

Interview ka nung jembidang Congress general secretary Jairam Ramesh-i, BJP-i tetsürtem reservations tenüng amer delimitation atema inyak, aser ibaji yimtenren tsütsü parnok asalentong ataloktsü atema liasü, ta ashi.

Ramesh-i, 2024 küm Lok Sabha election nung BJP-i menden 400 dak tali ngunüa liasü, aser ibaji linük temzüng yanglushitsü aser reservation anentsütsü atema liasü, ta ashi.

Sorkari atangji women's reservation atema bilema lira 2029 küm general election atema Nari Shakti Vandan Adhiniyam ya tang aliba Lok Sabha menden 543 nung ajemdaker benoktsüla, ta ashi.

Paisa, "Parliament nung opposition-i agütsüba vote ji tetsür reservations anema masü saka delimitation anema liasü. Congress-i, nenoki menden 543 nung tetsürtem nem menden shitettsütsüla ta ashi," ta metetdaksü.

Ramesh-i, Home Minister Amit Shah-i TMC aser Shiv Sena nung telemsa adokdaksür

aser item ajak ya pai Lok Sabha nung two-thirds majority bushiba agi lir, ta ashi.

"Linük temzüng yanglushia reservation anentsütsü atema parnoki menden 400 dak tema bushia liasü. '400 dak tali' ji iba atemaji lir, aser pai item party nung telemsa adokdaksüba kuliji tang nenoki angur," ta pai ashi.

Ramesh-i, BJP-i lenmang balala ajanga linük temzüng yanglushinüa liasü aser iba linük temzüng ajanga parnok tip-matemer, ta ashi.

Women's reservation dak sendakba nung Ramesh-i, "BJP nükjiongji tetsürtem nem reservation agütsütsü atema dang masü. Parnok atangji nükjiongji (SCs, STs aser OBCs) reservations agientsü aser tetsür reservations agientsü atema liasü," ta ashi.

Paisa, sorkar kümsük ano küm asem anünga lir, aser delimitation ya alizüng mezüngbuba dang liasü, ta metetdaksü.

Taküm April 17 nü tetsürtem reservation atema benokba Constitution amendment Bill atema Lok Sabha nung vote agütsütepa liasü. Iba bill pusema züngsem 298-i vote agütsü aser iba bill anema vote agütsür 230 liasü. Iba bill agizüktsü atema two-thirds majority nüngdaka liasü saka mengutet.



Taküm January ita nung Bombay Natural History Society (BNHS)-i Maharashtra kübok Melghat yimti nungi chiokba hogan telok kati state aika sema kilometer 3,334 senzüba sülen June 24, 2026 nü Rajasthan nung aliba Ranthambhore Tiger Reserve tonga arua aliba noksa nung angur.



TIR YIMYIM YIMOBILEM (EDITRIAL)

DIMAPUR THURSDAY, JUNE (AAMI) 25, 2026

Meputeptsü asoshi puteper

Tanü asüng ka dena nungi Nagaland nung kin o kin na tsüngda putepa alitsü asoshi akangjungshitepba sentong kanga angashir. Ajisüaka, Naga kintembo rangben ka küma longjemtsübo tasakba-tasakba kümadoker. Ibaji kodang bilemdangdir, Naga nunger kin anana asemsem tsüngda lungjemba ya Naga nunger lungjemtsü asoshi masü saka Naga nunger o Naga nunger na tsüngda tokteptsü aser rarateptsü asoshi lungjemer amai ka dang kümadokogo. Aji oda, Naga nungertem dak aketba ken o aser maparen kar adokra, Naga kintem rongnung tebilemba balala bener ken o aittsü aser Naga nunger kintem rongnung shisalemsatepa kenbang obang ka küma medemtsü merangtsü melena, Naga kintem rongnung kari onokibo magizüker ta yimjak nung metetdaksütsü aser idangji ano tanüngba kin kari onokibo agizüker ta sangdongtsü ta Naga nunger kintem ajak kenbang obang medemdak maka meputep tali atentsü asoshi putepertemji asenok kümogo. Atangji, Naga kintem ajak putepa alitsü asoshi ajaki kanga meranger saka Naga kintem putepdaksütsü asoshi kin o kin na akangjungshitepba Naga kinbo kata malitsü südi. Aji oda, alima nung alir Naga kintem ajaksa melungjemtetaka, Nagaland nung alir Naga kintem danga lungjema alitsü asoshi tawa Nagaland nung Naga kintem telungjem tentetba osang angashiogo. Ajisüaka, item rongnunga pei pei tebilemba aser tangatetba nungbo tangar kintem kenyongi mezüngshii ola agütsütepba angashir. Aji oda, Nagaland nung aliba Naga kin mesüaka 1963 küm December jakdang arua alir Naga nunger kar nem Nagaland nung senso temeten agütsütsü asoshi Nagaland government-i agizükba osang metetdaksüba sülen ibaji magizüktetba osang ka Nagaland nung alir Naga kintem telungjem kati metetdaksü saka ibaji ajembanga ano Nagaland nung alir Naga kintem telungjem katibo parnokibo state government-i item nemji senso temeten agütsütsü agizüker ta metetdaksü. Atangji, telungjem raksatsüsa iba onük ajanga adokba tebilemstü tangbo adoka malitsüa akok, saka kodang onük ka nung Nagaland nung alir Naga kintem rongnung telok telungjem tentet ana asem tsüngda tebilemba balala kümdir, iba jagi Naga kintem rongnung meputepang tali akümtsü. Aji oda, Nagaland nung alir Naga kintem telungjem tenteter aotsü tenzük metenzük ka, iba ama yimten onük nung tebilemba balaka kümer yimjak nung ashishitepba agi Nagaland nung alir Naga nungertem asoshisa shisabolu tuluba kümogo. Ashi, iba ama ken o tulu aser tasak ajurudang, Naga kintem rongnung pei pei tangatetba aser telemtetba balala yimjak nung jet jet ta memetetdaksü Naga kintem telungjem sabang ka yanglua likaji, yangji tama süoka jembiteper, kin ka anati mulungba nung masü saka akok tashi teimbai ta masü saka ajaki mulungba nung telemtetba agitettsüsa shisalemsateptet nungbo Naga nunger koda tia tajungba küma yanglutetla ta bilemer. Atangji, ajak kasa masü, kari ken o melamelaa angateter saka karibo mangatetter, ano karibo kechi tai ta bushir saka karibo kechi shitak ta bushir, anungji kodang itemji ajurutepa sensaksemdir, merajemi aliba rajemdaksür aser tamajung bilema aliba ajakto tai kümstür, anungji kintem aser telok balala rongnung temulung melemtet aliba aser tangar aija dang bilema aliba shisatsü to odaktsür aser shisa tajung, tangatet aser tesünep shisatsü Tsüngremi asenok nem agütsür. Iba tangatetba nung, tang nungi danga Nagaland nung alir Naga kintem telungjem yagi Naga yimten aser lokti nung ken o mangatetteptsü adoka aliba mapang, külemi ajurutepa shisalemsateper külenang, kechi ken o nung südir süaka, Nagaland nung alir Naga kintem bang ka nungi adokba ama temulung ka aser tangatetba ka ser ola agütsüra, panüji shitakba Naga nunger lungjemba anogo asütsü. Iba olajibo Tsüngremi ola ama asütsü.

OLEMSABANG

AO OSHI NUNG 'METAPHOR' ASER 'SIMILE' AMSHIYIM

~ Ms. Toshisangla, Asst. Professor FAC

Okila

'Metaphor' ta asüba ya Greek ojang 'meta' aser 'phero' tena lokteper ojang ka akümba lir. 'Meta' tetezü 'alembanga' aser 'phero' tetezü 'abentsüba'. Anungji 'metaphor' yagi tapu ka indang tetezüji tanga ka indang tetezü alemdanga bener oa medemdanga tesendaktep adoka sayur. Iba metaphor ya simile dang nungi balaka lir sakasa tenaprong yagi oset mesüra langka tapu ana medemdanga sayur. Asenoki aiben metaphor aser simile ana ya mebendangi meyoktepa amshir saka tena rongnung tepila ita lir. Kodang medemdangba oren ka nung 'ama' ta lidir ibaji Simile asütsü. Tat: La Shirong ama tekülak. Iba kasa orenji kodang metaphor nung amshidir " Laji Shirong lir" ta asütsü. Tenaprongla yagi tapu ana - 'La' aser 'Shirong' na tsüngta medemdangar ta angateter. Simile ya rhetorical device ka lir aser Simile ta asüba ya oset ana tsüngta medemdangba mapang amshir. Kodang medemdangdir 'mesüka' 'ama' ta amshir/inoker. Anungji kodang medemdangba oren nung 'mesüka' mesüra 'ama' ta amshia lidir ibaji Simile ta angateter.

Anogoshia libaliru tensa balala nung item anaprongla ya aiben kanga petpeta amshiba angur. Asen tetsü teboutemi asen oshi tezüluba nung makaba mapang nung item metaphor aser simile-tem kanga petpeta aser arokaroka amshiba indang angateter aser itemji tebang o agi melenzüka dang aru aser itemji tanü tashi asenoki angazüka bentshia arur.

Aortemi bulua amshiba metaphor aser simile telemsa kar yamai tongmelang agi agütsür

A. Maparen aser mapang balala nung bentshia aser jembiba Simile aser Metaphor kar:

1. Pa nashi pongchi ama tashitait.
2. La ninang ama mazüangi inyaker.
3. Kü teka rüjep ama mokong.
4. Süngtemji shiti ama tulu.
5. La bangji tepela ayongbang.
6. Alokba kü taküm milen.
7. Pa mulungjangji tzüym lir.
8. Ne tenükji petinu.
9. Temeimji ayi aketba naro lir.
10. Kü temangji tenla ki lir.
11. Pa otemji kü narong atema ken lir.
12. Tebuji kibong tongtoret.
13. Tanepbo ozü kidang kisemer anong ama apong.
14. Sobalibaji kin ka ayak.
15. Temetetba shisatsüji tashi.
16. La mulungjangji meranglung ama temerang.
17. Nisung ka arishiji sütaker süksen ama kara aor.
18. La mit mopungji yipru mesük.
19. La tenükji waro nük.

B. Lutsüa jembibayim (Insult) Tat:

1. Na ya tekatsü ar.
2. Kü medemla ya ammag pokpo lir.
3. La koya ama ola mali.
4. Pa küra ama kanga anüalem.
5. Pa tuti ama jaksajaklemer.
6. Narolaji lah ama tenük tapok.
7. La shijok ama kongrasüker.
8. Merenba nokji scütem lir.
9. Aiürlaji hiki asem dang.
10. Lar chipoji mojing ama naker.
11. Pa sentsüji ayaterem.
12. Pa tepuji koterang.
13. Tanurji tsüksü ama pungpapungpar.
14. La nükjangji pokpo ama jukteter.
15. Pa tenütsüji lungpak manung anü poluktsü ama prangshidar.
16. La tenütsü nungji tsük tin ka yokshia sademsademer.
17. Pa mulungsentsüji waro ama tanak.
18. Pa bangsemoji minkong min ama tasak.
20. Pa bangsobangle yimyaji Dalda pongdang nungi totzü yangshir ama.

(Maneni asüng adok nung...)

Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir

Yelwata nung tepsetba Khristantem nüngtem nung memorial ka semzük



Nigeria nung Benue State kübok Yelwata nung tepsetba Khristantem nüngtem nung memorial ka semzükba sentong nung tangokba noksa nung angur. Yaküm Father's Day anogomong nung Yelwata nung Islamic kiralongrartemi Khristan 270 tepseta liasü.

June 24, 2026: Nigeria nung Benue State kübok Yelwata nung tepsetba Khristantem nüngtem nung memorial ka semzükogo; iba memorial nungji asürtem tenüng ajak zülua lir.

Yaküm Father's Day anogomong nung Yelwata nung Islamic kiralongrartemi Khristan 270 shi tepseta liasü.

Iba nüngshilong nungji asürtem tenüng ajak zülua lir. Iba memorial ji Equipping the Persecuted telok nungi missionary temi semzüksü.

Equipping the Persecuted tentetsang, Judd Saul-i, "Nüngshilong nungji parnok ajak tenüng zülüogo, anungji parnok kodanga mamatoktsü," ta metetdaksü.

"Iba nüngshilong ya parnok taküm aser tamang kuli lir aser iba tatalokba ya alimai bilemtettsü atema asenoki amenoker. Khrista nung asen aianu aser adianutem reshikangshiba ya anenadoktsüla," ta pai ashi.

Iba nüngshilong semzükba sentong nungji yimsü balala nungi lenirtem aser yaküm iba lendong nungi jenburtem aika aden.

Kasa sentong nungjisa takoksa angurtem nem teyari agütsü. Yaküm iba tatalokba ajanga nisung 3,000 shi jenshia liasü.

Yaküm June 13-14 anogotem nung Fulani jihadist züngsemtemi Yelwata nung

aluyimer Khristantem amakba mapang nung Khristan 270 shi asü. Asürtemji teimbaka internally displaced persons (IDPs) liasü.

Khristantem amoi oa lia kiralongrartem aruba sülen kidang totzü shiloktsüba sülen mi senoktsüba ajanga aika rongseta liasü aser nisung 3,000 shi jenshi.

Nigeria nung nütsüng shilem 50 bo Khristantem lir, ajisüaka mapang shia Isamic telok balalai Khristantem amaker.

Tang alima nung Khristantem alitsü atema linük tamajungtiba 50 rongnung Nigeria ya jenjang 7buba nung lir (Open Doors World Watch List).

Mississippi nung pastor kati ghonda 96 tashi sayutsüngi



First Baptist Church nung pastor, Matt Olson-i sayutsüngidang tangokba noksa nung angur.

June 24, 2026: Mississippi nung aliba Arogo ka nung pastor kati ghonda 96 tashi sayutsüngiba ajanga otsü tasen ka yangluogo.

Sharon nung aliba First Baptist Church nung pastor, Matt Olson-i anogo pezü tsüngda Lipok nungi Jungkai Adok tashi sayutsüngia liasü.

Sayutsüngiba mapang nung mapang tatsütsü anisüngzüka chiyungtsü chia liasü.

Pastor Olson-i, "Tsüngrem O ya atangji aser teperi. Ali shi ajangabo ni meinyaktettsü saka Tsüngrem teyari ajanga ni ghonda 96 sayutsüngiteta liasü," ta ashi.

"Anogo 10 nü missionary training programme ka tembangba sülen ni iba ya apiteta liasü. Training agiba

mapang nung Laishiba mebeni arem nung ghonda 96 liasü. Iba ya ajanga Laishiba junga meteta alitsüji kanga nüngdak, ta ni rateta liasü," ta pai metetdaksü.

"Arogo nung lenirtem den kü tebilemba lemsatepba mapang nung parnoki 'ni yia aiter asütsüa akok' ta bilema liasü, ajisüaka iba sentongji pusemtsü parnoki melung," ta pai ashi.

Iba sentong agitsü atema medical aser technical teyari agütsü aser kari methitemi sarasademja liasü.

Guinness World Record inyakyim mesüka ghonda 96 sayutsüngiba mapang nung ghonda shia minute 5 anisüngzüka liasü.

Pastor Olson-i, "Iba ya world record otsü yanglutsü nükjidong nung masü saka Yisu Khrista

osangtajung sangdongtsü atema liasü, kechiyong Pai kümzüker aser Tsüngremi asenok jatetba ama inyakba dang lir," ta ashi.

Mapang talangtiba o jembiba World Record ji Nepal nungi Ananta Ram KC-i yangluteta lir. Pai ghonda 90 ser minute 5 jembia liasü.

Ananta Ram dang nungi pastor Olson-i mapang talangtiba jembia liasü, ajisüaka Arogoi iba ya World Record atema ayongzükbba masü, ibayongji ketdangsertem mejaok.

Olson-i, iba ya ajanga kü tamang tashi itshiogo aser Lai tsütsü tangatetba kanga kaogo, ta ashi.

"Yisu Khrista ya Kibur. Ni sayutsüngiba oren shia atema Pa temsüa lir," ta ashi.

ANOGO ABEN TSÜNGREM DEN

Nenok temang Tsüngrem tenla ki

Nenok dak aliba Tanela Temeshi, shiba nenoki Tsüngrem nungi agizük, nenok temang pa tenla ki ta nenoki memetet no?

1 Korint 6: 19.

Alexander tulusang ya küm 16 nung Mesotomia nung yimsüsür aküm, küm 18 nung takoker general ka aküm, aser küm 20 nung chuba aküm, saka küm 33 majungdang chidiyungdir ka ama asü. Pai pa sasa dak takok mangu.

Temesepba tali ajemba ajanga azü tokshiba, balaluyuba, kibong raksaba, lendong aser rarabangsen tali adoker. Yi ajemba nung sen jenti endoker, mapa nung tamakok angur. Yamala mesukba timtem jentisa jenti lir.

Aika temulungjang, kibong aser taküm yi nungi mepilatetba ajanga tali tali dang raksar. Asen temangji Tanela Temeshi alidak ki lir. Tsüngremi asenok nem temang ya temeshi nung agütsü. Saka meimchirtemi iba temeshiji raksaba ajanga Pai Pa ajaso chir Yisu Khrista asüba aser shia aruba ajanga asenok tanaben alangzük. Aser iba alangzükbaji ajanga ibai Pa meyong aküm.

Asen temangji Tsüngrem meyong lir. Ibai aseni mulungba nung amshitsüba masü. Ibai Pai ne nem ketdangsütsü agütsüba lir. Temeshi Azü agi alizükba temang asenoki meraksatsüla. Tsüngrem nükdang ibai senti lir, aseni senti süa amshitsüla.

Baptist pastor, Allan Finnegan alima nungi pilaogo



Allan Finnegan

June 24, 2026: Taoba mapang 2022 küm nungi Finnegan Britain's Got Talent nung semi final tashi tua toktepsang aser Baptist pastor, Allan Finnegan alima nungi pilaogo; pa arrshi küm 59 liasü.

Pa tenük aser temesen cancer agi shiranga liasü.

June 19, 2026 nü pa alima nungi pilaba mapang nung pa den pa kinüngtsü Joyce aser jala ana- Beccy aser Rachael nunger liasü.

Parnoki social media ajanga, "Tesüiba küm pongu jungnüa pai cancer tashidak anema raraa aruogo. Kibong ka ama pa bilemtettsüsa tatalokba aika lir. Onoki pa kanga meimer aser kanga menungratsü," ta metetdaksü.

Merseyside kübok Bootle nungi Finnegan-i school züngtur anen aser tamasabo kiojen asüba mapa inyak aser tesülen Arogo ka nung pastor inyaka liasü.

Pa tainlonglong asüba mapang sarasadem ka agiba sülen pa taküm melenshi.

2022 küm nungi Finnegan tenük nung timtem adoka liasü aser tesülen pa dak tenük cancer tapu ka 'ocular melanoma' putet.

Pai pa taküm nung timtem ajangshiba ajanga Arogo dak sendakba aser Khristan tamang jenjang melenshiba lemsatepa liasü. "Timtem ajanga ni tejashi aser tamang asüngsashiba tsüngda raratsüsa aküm," ta pai ashi.

"Arogotem aikati nisungtem pelaa lidaktsüner, ajisüaka timtem tejashi ajangshiba nung ang atangji jenjang keta lir," ta pai ashi.

Osangbener den jembidang Finnegan-i, "Ni mapang apur taküm alir," ta metedakja liasü.

Tesülen pa treatment agitsü atema par kibongi GoFundMe campaign ka tenzüka liasü, aser doctor temi pa arrshi atakzüksüba dang nungibo mapang talangba liogo.

Finnegan-i pa kinüngtsü Joyce den jala ana- Beccy aser Rachael nunger toktsür pilaogo.

AO OSHI ANGAZÜKDAK:**TANÜ ANGAZÜKTSÜBA OJANG**

Tir Yimyim

Yimtiba

(n) yimtem rongnung tulutiba (greatest village, headquarters)

* Nagaland nung Kohima ya yimtiba lir.

Yimtok

(n) nisungtemi toktsür aoba yim tejen (abandoned village)

* Yimtak alirtem putepa melira pei yim agi yimtok akümtsü.

OLONG PAITEP # 7545

1		2		3		4	5			
				6						7
		8								
9				10		11				
			12					13		
						14				
16						17				

TIPIEN

- | | | | |
|----------------------------|-------|--------------------------------|-------|
| 1. Nisung jenti | - (5) | 1. Tenük telong | - (9) |
| 4. Tsük rudenba | - (5) | 2. Committee dang ajar | - (5) |
| 6. Temzüng tesashi | - (5) | 3. Yagi ki okdoker | - (7) |
| 8. S ___ i | - (3) | 5. Yim lenmang | - (5) |
| 9. Nisung telemsa | - (3) | 7. Temoatsü keter meyipa aruba | - (9) |
| 10. Anogoshi | - (4) | 11. Kanga junga menemba | - (7) |
| 12. Ajanga aor | - (4) | 12. Majinü | - (5) |
| 13. Tsük rizüngdak | - (3) | 13. Tzüma nung senzüba | - (5) |
| 14. Tebang nungi adokba | - (3) | | |
| 16. Süngdong tatembangtiba | - (5) | | |
| 17. Meputep | - (5) | | |

LANGTSÜNGLEN**OLONG PAITEP # 7544 TELANGZÜBA****TIPIEN :**

- | | |
|--|--------------------------------------|
| 1. Telok, 4. Aluru, 6. Ozüing, 8. Emk, | 1. Tenükjang, 2. Luden, 3. Kiochtsü, |
| 9. Kin, 10. Teti, 12. Süir, 13. Jen, | 5. Lenti, 7. Tajangzük, 11. Teronem, |
| 14. Ola, 16. Talak, 17. Mazük. | 12. Sempa, 13. Jahaz. |

LANGTSÜNGLEN :**SÜPPKREM YA KECHI ?**

Jabaso : Oba, Aori süpokrem ta ajaba ya komala mapa ka dang ajar ?

Alokba : Tebusang nai tim asüngdangogo, ni tatishitsü ka dang shidi ena, Nisung ka interview kanga junga agütsü saka result atokdangbo matener, ya kechiba takok mangur ta süra tangar kabo interviewji junga magütsü saka pari tolu nem sen mesüra senti oset kar süpok nung rempanger bener oa agütsür, ibayongji parnokjibo takok ngudaktsür, yamala mapa dangji süpokrem ta ajar, tang asen lima iba mapa jagi sünga aliba ya koda !!!

Jabaso : Süra Oba, tang World Cup asaya nungya asen Aor Naga nungera aten ka asünunga ball tasayadak nungji Telok kati Telok ka dang onoki süpokrem agütsüdi nai nür tsütsüleni Goal yokang ta ashinunga ajia takoktsüna ?

Alokba : Kodasür !!! Asen Aor aser Naga nungger tanga mapa nungbo majung saka yamala mapa nungjibo kanga mongin nung koda !!!!

Jabaso : Oba Alokba !!!!

Lilir- I. Kilang Ajem, Indisen, Dimapur.

Manipur hill district tem nung sepai talila lemzüktsüogo

Manipur nung central security forces aser Manipur Police külem telok kati mita aodang tashiyim agi sen meshia senzür telungpur asem apuba angur. Parnoki Thoubal aser Imphal West district tem nung mita aodang telungpur asem apu.

Imphal, June 24, 2026

(Agencies): Manipur hill districts nung Central Reserve Police Force indang elite Commando Battalion for Resolute Action (CoBRA) densema security forces talila mapa lemzüktsüogo aser külen de-weaponisation exercise ka inyaker ta Manipur Home Minister Govindas Konthoujam-i ashi.

Manipur nung valley districts nung security tensa tajungba kümogo aser iba jagi security agencies-i tenemlen temulung agüja inyaker ta Konthoujam-i ashi.

"Lendenlen tilateri

tatalokbatem alitsü akok ajisüaka tenemlen lendong tulutem ataloker. Sepaitemi tenemlen mapa shitak inyaktettsü atema lendenlen tensa süngjema ayutsüla" ta paisa ashi.

"Manipur litsü nung 90% jungnüa hill districts lir aser tesüiba itatem tensa mejungi dang arur. CRPF nung CoBRA unit dena security forces talila mapa lemzüktsüogo aser parnoki aibelenertem bushir" ta Minister Konthoujam-isa ashi.

National Investigation Agency-i prangpong auyaba ken o dak sendakba nung Arambai Tenggol züngsem asem apuba

atema Home Minister-isa olen ka ashi.

"Onoki DGP den iba dak sendakba onük jembiogo. Tarutsü nung nisung shinga maputsü jembiogo" ta pai ashi.

"Ozüngi memelaba prangpongtem benshidar aser talisa ibaji valley districts nung lir ta intelligence osang ajanga ashir. Anungji item prangpong yua alirtemi ketdangsür ket nung agütsütsü ayongzüker" ta Konthoujam-isa ashi.

Manipur nung yimjung bener arutsü aser tensa süngjemtsü asoshi ozüing alema benshiba prangpongtem aputsü meranger ta paisa shisem.

Japan PM Takaichi-i Guwahati semdangtsü aliba athir

Guwahati, June 24, 2026

(Agencies): Japanese Prime Minister Sanae Takaichi-i July 1-3 tashi India-i arudang Guwahati semdangtsü sentong thiogo.

Iba ajanga New Delhi nung ang India-Japan summit alitsü ta osang angazüker.

Tesüiba nung New Delhi dak alia Guwahati nung iba sentong alitsü jembitepa liasü. Ajisüaka mapang tepetdak asüba agi New Delhi nung

dang iba sentong alitsü ta angazüker.

Prime Minister Takaichi-i Japanese Diet indang session den lar linük nung maparen teinyaktsü aika aliba India semdangtsü mapang petdaker ta osang ajanga ashi.

Japanese Prime Minister-i July 1 nü Prime Minister Narendra Modi den summit-level talks atema Guwahati-i arutsü akok ta taoba hopta

Assam Chief Minister Himanta Biswa Sarma-i shia liasü.

Takaichi-i India mezüngbuba official visit mapang Guwahati semdangtsüba ya tongtipang mapa ka ta züngshia liasü. Japan-i Free and Open Indo-Pacific (FOIP) vision kübok South aser Southeast Asia den maparen inyakba nung India kübok Northeast ya tongtipang ama züngshir.

Nagaland Institute of Medical Sciences and Research
Kohima: Nagaland

ADVERTISEMENT No. 2/2026

No.NIMSR-6/31/HR/Advt/2024: Dated Kohima June 2026

Applications are invited from eligible candidates for the following posts to be filled up under Nagaland Institute of Medical Sciences and Research (NIMSR) Kohima.

Sl.no	Name of Post	No. of post	Mode of Recruitment
1	Junior Resident	10	Contract
2	Office Superintendent (Accounts)	1	Deputation

- The detailed information (Qualification, Experience, Pay Scale, Application Form) etc. may be downloaded from the website <https://nimsr.nagaland.gov.in>
- Online application form available in the website, should be filled and submitted via nimsrhrsec@gmail.com or before 19th July 2026 by 2:00 PM for the candidates applying for the post of Office Superintendent.
- Candidates applying for the post of Junior Resident shall bring all original documents on the day of interview and also submit 1(one) copy of self-attested documents along with the filled application form available.
- Candidates are advised to visit the website <https://nimsr.nagaland.gov.in> regularly for latest update.

Sd-

ANOOP KHINCHI, IAS

Commissioner & Secretary Health & Family Welfare
Department and Chairman, EC, NIMSR Kohima

Ukraine-i Crimea amak; Sevastopol nung power makai kümogo

Moscow, Aami/June 24 (Agencies): Ukraine-i Russia-i atsünger aliba Crimea tesem amakba sülen iba tesem kübok yimti tuluba Sevastopol nung power makai kümogo, ta linük anapronglai metetdaksü.

Ukraine indang army-i iba tesem nung Russia indang logistic tem aser southern Russia totzü asüngtetdak aser bendena ayudak amakba sülen Crimea nung nüburtem dang totzü ayokba anena atatsüsa aküm.

Sevastopol nung Moscow-i shima toktsüba governor, Mikhail Razvozhayev, shibai Ukraine-i energy facility tem amakba sülen power maka akümiba indang metetdakja liasü, pai Bodhbarnü iba tesem nung alirtem dang jenjang mejungi aliba kidangertem nem teyari agütsütsü aser jongdak

mapang tongteprateptsü atema battery kümzüka ayutsü aser grid tem overload mesüdaksütsü atema phone tem tali mamshitsü mepeshia liasü.

Paisa yimti nung tesem kar, kong temperature 30 degrees Celsius tonga tudar, item tesemtem nung Bodhbarnü nikongtsütsü tashi power magütsütettsü ta shiogo.

Sevastopol nung Trolleybuses ya Bodhbarnü inyaksangshi masütsü, ta Razvozhayev-i ashiba den, tsürapurtem dang pei tanurtem ki toktsü meyoktsü ayongzüka liasü.

Kherson nung Russia-i atsünger aliba tesem aika nunga power makai aküm, ta Governor Vladimir Saldo-i ashi.

Maneni Ukraine-i drone amshia Russia kübok Nizhny

Novgorod tesem amakba sülen nisung ana tepsetogo aser Belgorod nunga nisung ka teseptogo, ta local governor temi metetdaksü.

Kasa mapang nung Russia-i drone amshia Kharkiv tesem amakba mapang arishi küm 56 tain tetsür ka tepsetogo, ta ketdangsürtemi metetdaksü.

Russia indang defence ministry-i ashiba agi, linük air defence-i Ukraine nungi yokba drone 300 dak tema khazüka yokogo.

Kyiv indang air force-i Bodhbarnü ashiba agi, Russia-i drone 101 yok aser parnoki 95 bo khazüka yokogo.

Kyiv-isa, Mongolbarnü sangdong ka ajanga, parnoki Crimea nung railway apu ka, power plant ka aser tanga tongtibang infrastructure tem makogo, ta ashi.

MoU ya US tamakok sangdongba lir: Iran



Mohammad Bagher Ghalibaf

Tehran, Aami/June 24 (Agencies): Iran ya

lendongbang nung lir aser atsüanem akatsü renema lir ta US Tir Donald Trump-i shir anogo ka lir Iran asoshi yimjung ken o jembir Mohammad Bagher Ghalibaf-i Memorandum of Understanding (MoU) zülutepba ya America-i tamakok ajuruba sangdong ka lir ta ashi.

February 28 nü West Asia nung tenzükba rara tembangtsü asoshi taoba hopta US aser Iran tezüngzüktep ka zülutepa liasü aser teti asoshi tangatettep kati arutsü atema jembishinü tenzükogo.

Mezüng high-level negotiations ya Switzerland nung aliba Burgenstock resort nung Qatar aser Pakistan tetsüngtai ia mena liasü.

"Islamabad tangatetba ya ajungshiba aser tashiyim amshiba ajanga masü, saka tasü tait Iran linük-i nokdakba aser tashi ajanga liasü," ta Mohammad Bagher Ghalibaf-i ashi.

"Iba yongji Islamabad Memorandum of Understanding ya America nung security ya region nung aliba linük temi azüoktsüla ta tuteta ashi.

Kasa mapang US Secretary of State Marco Rubio ya United Arab Emirates lenir Mohamed bin Zayed den temai madoki senden amentsü lir aser iba sülen Kuwait aser Bahrain nung oa Gulf Cooperation Council senden nung adentsü.

Rubio ya Gulf lenirtem den US-Iran memorandum of understanding indang jembitsü tebilemba lir ta ashir, kong Iran indang missile programme aser proxies indang shia mali, koba Gulf linüktem aser Israel asoshi mapang talangka nungi tebilemtsü tulu lir.

Strait of Hormuz tanaben lapoktsü indang jembidang, "Ibai international tzü lenmang lir... Linük kata international tzü lenmang nung tolls mesüra taa meshitsü memelar. Ibaji tang tamshidak international law lir," ta ashi.

US Tir Donald Trump ya par party lenirtemia aitsür, aser Mongulbarnü Senat nung congress temelaba makai Iran anema mitkar temi mera magitsü lemtetba sülen, pai Tehran tashi mait jenjang nung lir aser atsüanem akatsü renema lir ta shia liasü.

"Iran ya süngzü nung nokdaka lir aser tsüktsü renema lir, kechiserna ajunga yutsütsü mulunga lir, aser küm aika nung tang mezüngbuba United States aser iba indang tir, NI akumtsübor," ta Trump-i X nung post asü.

Paisa Strait of Hormuz ajanga senzüba rong nungi tolls memeshir ta Iran-i United States dang shiogo, ta Bodhbarnü ashi.


Hombarnü Switzerland nung mezüngbuba jembishinü tembangba linük ana yagi Iran asoshi senotsü teyari agütsütsü, Strait of Hormuz azüoktsü aser Israel-i kasa mapang Lebanon nung raraba indang o balala jembir, aser item ajak ya rara tembangtsü nükjidong nung taoba hopta zülutepba framework deal nung tongtipang lir.

Par Republican Party nungi hardliners tem densema linük nung aikati iba tezüngzüktep asoshi Trump aitsür.

"Iran-i US dang, timtem adokdakja osang tiazü liaka, Strait of Hormuz nung senzüba rong tem dang Iran-i tolls, insurance sots mesüra tanga senotsü kecha memeshir ta US nem metetdaksüogo," ta Trump-i social media post ka nung ashi.

"Ibai osang tiazü asünungbi, jembishinü tanga tembangtsü!"

Pakistani rights activist Mahrang taküm tepeyong tepuokdaki yokogo



Quetta, Aami/June 24 (Agencies): Pakistan nung anti-terrorism okadak kati civil rights activist Mahrang Baloch aser la nem teyari agütsür ka 2024 küm July ita paramilitary sepai ka tepsetba atema taküm tepeyong tepuokdak ayutsü obendang agütsüogo.

Baloch indang okatsüri ashiba agi pai iba obendang anema ken o ka benoktsü.

Baloch shiba 2025 küm March ita nungi sota yua liasü, la Pakistan southwestern Balochistan province nung nisungtem taolen memeteti samaba aser meimchir temeden anema inyaksangshiba atema ola adoka aruogo. Balochistan province nung ya nüjiso bushiba teloktem küm aika sorkar den rara arudar.

Human rights activists temi parnok obendangba yimya ya aija aruogo, kong aija alirtem tepuokdak nungi video link ajanga okadak nokdaksü tetuyuba agüja liasü.

Parnoki ashiba agi, Baloch aser Sibghatullah na taküm tepeyong tepuokdak ayutsü obendanga agütsüba ajanga state dak nüburtemi tamang makateti akümstsü. Sibghatullah ya Baloch Yakjehti Committee (BYC) advocacy group indang lenir ka lir.

Balochistan sorkar ketdangsürtemi ashiba agi, Hombarnü obendanga agütsüba ya tebandang makai ken o angadangba sülen agütsüogo, aser longkak aiterem shirnoki azütokshi adokdaksü aser state ketdangsürtem dak rangloker

inyaksangshir parnok ajak kiralongrar ama obendangtsü ta kuli agütsüogo.

Balochistan province chief minister Sarfaraz Bugti-i ashiba agi, Sepoy Shabbir Baloch nem ochi obendang agütsüogo, shiba Gwadar nung duty nung aliba mapang longkak aitertemi tepseta liasü.

Quetta anti-terrorism okadaki ashiba agi, parnoki Baloch aser Sibghatullah na ya nisung tepsetba aser kiralongrar dak sendakba nung aibelena aliba ngutetogo.

Okadaki ashiba agi, Baloch-i longkak aitba tesemi yoker aliba paramilitary personnel tem amaktsü atema longkak aiterem ajungmso, aser tenük kuli agütsürtem aser medical kuli ajanga iba obendang ya shitak ta kuli agütsüogo.



MAHATMA GANDHI CENTRAL UNIVERSITY, BIHAR

(A Central University established by an Act of Parliament)

PG ADMISSIONS 2026-27

Through CUET (PG) 2026

Applications are invited from candidates who have appeared in CUET (PG) 2026 for admission to Postgraduate Programmes.

LAST DATE TO APPLY
30th JUNE 2026
TUESDAY

PROGRAMMES OFFERED
M.Sc. | M.A. | M.Com. | MBA | MBA (Food & Agribusiness) | Integrated MLI

APPLY ONLINE
mgcubcuetsamarth.edu.in/pg

FOR DETAILS
www.mgcub.ac.in

CBC 21336/11/0001/2627 LEARN • INNOVATE • INSPIRE MOTIHARI, BIHAR

FIFA WC: Portugal, Croatia, Colombia nungeri asaya kokogo

Aami/June 24, 2026 (Agencies): Houston nung Portugal-i goal 5-0 agi Uzbekistan akokba asaya nung Cristiano Ronaldo-i goal ana idakja pa aitsürtem nem telangzüba tapet agütsüogo, aser par team World Cup knockout stage-i aitsü ana nung lir.

Portugal captain yagi asaya tenzüker mapang tatsüka tsüngda mezüngbuba goal idaktsüba sülen puti otsü nung pa tenüing zülüoka pa ya World Cup balala trok nung goal idaktsüba mezüngbuba asayar aküm.

Group K nung mezüngbuba asaya Democratic Republic of Congo den goal 1-1 agütsür tembangba sülen Ronaldo ya nisung aikati aija liasü. Iba asaya nung arishi küm 41 tain asayar yagi temelenshi kecha bener marutsütetba sülen pa melentsü atema head coach Roberto Martinez nongshia liasü.

Ajisüaka Martinez-i Ronaldo dak tamang ka-a asaydaksü aser pai telangzüba tajung agütsüogo.

Asaya tenzüker minute 3buba nung goal tera agi midaktsüba sülen minute asem dang lir Ronaldo-i mezüngbuba

goal idaktsü.

Iba sülen minute 17buba nung Mendes-i free-kick tajung ka metsüokja Portugal pur goal ana agi tejakdang aküm. Uzbekistan-ia Azizjon Ganiev ajanga goal ka idaktsü saka goal idaktsütsü atema asayaba mapang Cancelo dak foul menaba ajanga VAR-i iba goal magi kümdaktsü.

Maneni asaya mezüngbuba shilem tembangtsü minute trok anunga lia Ronaldo-i pa atema goal tanabuba aser team atema goal tasembuba idaktsür parnok goal 3-0 agi tejakdang aküm.

Asaya tanabuba shilem nung Uzbek goalkeeper-i own goal ka idaktsü aser iba sülen minute 87buba nung substitute Rafael Leao-i goal pongububa idakja parnoki asaya akok.

Mongolbarnü tanga asaya ka nung Croatia-i kanga meranga asayar goal 1-0 agi Panama koka parnok timla mesamai lir.

Group L nung parnok mezüngbuba asaya nung England goal 4-2 agi makokba sülen asaya tanabuba shilem nung Ante Budimir-i goal ka idaktsüba ajanga parnoki kanga dang tongtimbang point asem ngutetogo.

Asaya nung goal ka ya minute 54buba nung Josip Stanisic-i agütsüba ball ka Budimir-i kanga junga idakja liasü.

Iba sülen mapang tatsüka dang lir Croatia-i tanabuba goal idaktsütsü maongka angu, ajisüaka Luka Modric shiba linük tenüing nungi asaya 200buba nung asaya liasü pai Marco Pasalic nem ball tajung ka agütsü saka Pasalic-i metsüba ball ya Mosquera-i nokdang aser tsükdaker adokba ball ya Croatia nunger forward yagi bar adena metsütoka liasü.

Iba asaya akokba sülen Croatia-i point asem nguogo aser parnok tatemsa Ghana den asayatsü, shirnok England den draw asüba sülen point pezü ngur lir.

Kasa asayamung tanga asaya ka nung Colombia-i goal 1-0 agi DR Congo akokba sülen parnok knockout stage-i iogo.

Asaya nung goal ka ya Daniel Munoz-i minute 74buba nung idakja parnoki asaya akok. Iba asaya akokba sülen Colombia pur Group K nung temaba jenjang nung lir aser tatembangbuba asaya portugal den asayatsü.

ICC rankings: Gill-i Kohli ajateta no. 2 asayar kümogo

Aami/June 24, 2026 (Agencies): Bodhbarnü sayaba ICC ODI batting rankings nung India captain Shubman Gill-i külem India nunger asayar Virat Kohli ajateta tanabuba jenjangi tuogo, shiba tasembubai asepzüka luogo.

Kasa mapang nung Rohit Sharma Afghanistan den kanga takok ngua asayaba sülen maneni pezübuba nung lir.

Tawa India team Afghanistan den ODI asaya asem asayaba nung kanga junga asayaba sülen Gill tanabuba jenjangi tuogo. Asayamung tepeyong pai kanga junga asaya-a India-i iba asayamung 3-0 agi akokba nung pai tongtimbang shilem agia liasü.

Mezüngbuba ODI asaya nung pai run 84 yanglu aser tanabuba nung run 154 yanglua liasü. Asayamung tepeyong kanga junga asayaba sülen pa nem Player of the Series award agütsü aser rankings nung jenjang asem tejakdangi tuogo.

Cricket asaya nung Kohli ya maneni batter tem rongnung takok tajungtiba anguba asayar ka süaka pa jenjang ka asepzüka luogo. Taoba mapang India captain ya No. 2 jenjang

nung mapang talangka liasü, saka pa IPL 2026 final nung hamstring yiruba ajanga Afghanistan den asayamung nung shilem magiteti liasü. Pa iba asayamung nung masayaba ajanga Gill nem ajatetdaksüogo.

Ajisüaka Kohli July ita England den ODI asaya asem asayatsü aliba nungbo shilemagitsü renema lir, aser iba asayamung nung junga asayatetra pa maneni temaba jenjangi atutsü. Rohit Sharma shiba tang pezübuba nung lir pa-a rankings nung temaba jenjangi atutsü atema nükjidong yur alitsü. Afghanistan den asayamung nung Rohit-i run 143 yanglua liasü. Pai tatembangbuba asaya ana nung run 48 aser 79 yanglua liasü.

ODI ranking nung Daryl Mitchell maneni temaba jenjang nung lir. Pai point 815 ngur lir. Maneni Afghanistan nunger asayar Ibrahim Zadran India nung junga masayatetba sülen asepzüka luogo.

Bowler tem rongnung Matt Henry-i Jasprit Bumrah menepa ICC Men's Test Bowling Rankings nung tenapronglai point 870 ngua temaba jenjang nung lir.

Leeds-i Wilson alizüktsü atema mulunga agizükogo

Aami/June 24, 2026 (Agencies): Leeds-i Fulham attacker Harry Wilson den küm talangka atema tenangzüktepba ka yanglutsü mulunga agizükogo. Pa ya iba transfer window nung Leed puri anisemba mezüngbuba asayar akümtsü.

Arishi küm 29 tain Wales nunger international asayar ya taruba hopta contract tembangtsü, ajisüaka pa medical tetendangba agitsü lir aser taruba anogo ishika tsüngda tenangzüktepba yanglutsü imlar.

Pa den tenangzüktepba yanglutetra iba Yorkshire club asoshi takok tulu ka asütsü, kechiyong Premier League nung tanga club temia pa alizüknüa liasü.

Wilson ya Leeds puri mapang talangka tenük yoka aruogo. Parnoki taoba mapang pa alizüktsü merang saka transfer window tatembangbuba anogo inyakyim chirepa liasü.

Pai club toktsür aoba ya Fulham atema takoksa tulu asütsü, shirnoki pa meyoktsü atema contract aika agütsüogo.

Taoba season pai asaya 38 nung goal 11 idaktsü aser assist ti süja liasü, koba asaya ana nung khenbo goal idaktsüba nung densema aliba asütsü.

Wilson ya 2021 küm Liverpool nungi pound million 12 agi Fulham nung aden.

Cottagers pur ya Marco Silva, Benfica-i aoba sülen tang tashi manager meshimi lir,

saka taoba mapang Liverpool defender aser Real Madrid interim boss Alvaro Arbeloa den sensaksema arudar.

Kasa mapang nung Leeds pur taoba mapang Borussia Dortmund midfielder Julian Brandt alizüktsü atema maneni merangdar.

Arishi küm 30 tain asaya ya free transfer nung anisemtettsü lenmang sadema lapoka lir, saka pa Champions League club temia alizüktsü tejangraba lir.

Leeds puri Southampton nungi asayar Shea Charles-a asadangdar. Ajisüaka arishi küm 22 tain Northern Ireland nunger midfielder atema Leeds puri pound million 20 agizükba Southampton-i magizük.

Jyothi Yarraji Asian Games atema qualify süogo

Aami/June 24, 2026 (Agencies): 100m hurdles nung national record bener alila Jyothi Yarraji yiruba ajanga küm ka shi masayai lir meyipa arur asayaba mapang Athletics Federation of India's (AFI) Asian Games qualifying standard tongteta Asian Games atema qualify süogo.

National Inter-State Championships tenzüker mezüngbuba anogo Bodhbarnü la qualify sütetogo.

Yarraji, shiba taoba küm July ita anterior cruciate ligament (ACL) surgery takok ngua agiogo, lai heats nung alizüing 13.14 seconds nung tongteta AFI's qualifying mark 13.34

seconds ya ayong ayonga tongteta liasü.

Arishi küm 26 tain asemteper yagi 2022 küm China nung Asian Games nung silver medal ngua liasü. Lai 2023 küm 12.78 seconds nung alizüing tongteta national record yanglua liasü, koba tanü tashi shingaia majateti lir.

La ya taoba küm June ita training agiba mapang yirua liasü.

Kasa asayamung nung India nunger long-distance runner Gulveer Singh-i tebur 5000m asemtepbabo ako saka Athletics Federation of India's (AFI) Asian Games qualifying standard (13:39.18) metongteti pa Asian games atema qualify

mesütet.

Bodhbarnü tebur 5000m asemtepba nung pai alizüing ya 13:52.92 nung tongteta liasü.

Uttar Pradesh nungi arishi küm 26 tain asayar yagi taoba ita Los Angeles nung alizüing 13:03.93 nung tongteta outdoor national record yangluogo, saka Bodhbarnü asemtepba nung pai junga masemteti liasü.

2025 küm February ita Gulveer-i otsü tasen ka yanglua, pa India nunger rongnungi 5000m asemtepba minute 13 majung dang asemzükba mezüngbuba asayar aküm. Iba mapang pai alizüing 12:59.77 nung tongtet aser national aser Asian indoor record yanglua liasü.

INDIA OSANG :

Tapak 3 nungi...

Ram tekülem ki tenla auyaba dak ...

Samajwadi Party MP, Rajeev Rai-ia Ram tekülem ki atema tenla agütsüba Ram süngyanglu ka noksa lemsatepa, 'iba süngyanglu ya kong lir?' ta asüngdang.

Rai-i, "Thanjavur style nung süngyanglu ya sen crore aika jenjang lir, aser iba ya Bangalore nungi kü medemer Jai Shri Faneesh-i Ram Mandir atema tenla agütsüba lir. Mezüngbo trust ketdangsertemi iba ya museum nung yuang ta ashi, saka tekülemertemi agütsütsü memelung, anungji Kedareswar tekülem kidang ayutsü ta ashi. Ibaji angashia Ram Mandir Trust-i idangyongjisa Ram tekülem kidang ayutsü melung. Yimlibilema iba süngyanglu ya kong ali mesüra auyadokera shiang," ta metetdaksü.

Ano külen Castles Group Of Companies nung Chairman aser Managing Director, Dr. Raju V Manwani-ia, Sindhi nunger tenüing nung jandi lungru 200, lungru shia seret kaka ji 2021 küm January 26 nü Ram tekülem ki atema

Champat Rai nem agütsüogo, ta metetdaksü.

Paisa, "Iba mapang nungji onok nem receipt magütsü. Pai onok dang, parnoki mezüing reprangdanga kong-koma amshitsüar telemtetba agiba sülen ang onok nem osang metetdaksüdi ta ashi. Ajisüaka osangtem angazükba sülen onok shisabulu tenzüik. Onoki agütsüba jandiji tesem tai ka nung ang ali asü? ta bilem. Anungji onoki receipt agüjang ta ashi aser jandiji koma amshiar asüngdang. Jandiji tekülem ki atema mamshi süra ibaji tejashitsüka lir. Tekülem ki atema agütsüba tenla ka tanga nung amshira tarutsü nung tenla agütsütsüpur malitsü," ta ashi.

Paisa, "Onoki jandi agütsüba mapang nung jandiji sen crore 1.5 nungi crore 2 jenjang liasü. Tanübo ibaji sen crore 6-7 jenjang lir. Modi aser Yogi na lenisüba kübok tamakoktsü kecha mali. SIT ka tenteta lira tim masüba nung tashi amshirtem nem temerenshi agütsütsüla," ta metetdaksü.

BILEMDANGANG

"Na shirnok den medemdir memeteti parnok ama akümtsü."